

Nameya Pawlos a ji Efesiyan re

Pêşgotin

Efes bajarekê Romayê yê li Asyaya Biçûk bû. Ev bajêr li Asyayê paytext bû. Ev bajar bi mezinbûna xwe, di Împeratoriya Romayê de bajarê çaremîn bû. Efes bajarek gelek bedew û xweş bû. Serdana Pawlos a pêşî ya Efesê, di Karên Şandiyên 18:18-21 de, serdana wî ya diduyan jî di 19:2-7an de tê gotin. Pawlos bi qasî sê salan li vî bajarî ma û bawermend perwerde kirin.*

Pawlos name di girtêgehekê de nivîsî. Her çiqas nameyên Efesiyan û Kolosiyan bimînin hev jî, mijarên wan ên bingehî cihê ne. Mijara vê nameyê di 4:13an de tê eşkerekirin: Xwedê mirovan bi keremê digihîne azadiya jiyane (1:7; 2:5, 7-10). Armanca wî ew e, ku hemû dinyayê di têgihîştina Mesîh de bigihîne yekîtiyê.

Ev name dikare weha bê beşkirin:

I. Silav 1:1-14

II. Mesîh û Civîn 1:15-3:21

III. Jiyana nû ya bi Mesîh 4:1-6:9

IV. Çekên Xwedê yê ruhanî û silav 6:10-24

Silav

1 Ji Pawlosê* ku bi daxwaza Xwedê Şandiyê Mesîh Îsa ye, ji pîrozên* li Efesê re yê ku bi saya Mesîh Îsa dilsoz in:

² Ji Bavê me Xwedê û ji Xudan Îsa Mesîh, kerem û aşî* li ser we be.

Pîroziya Ruhani

³ Xweda û Bavê Xudanê me Îsa Mesîh pîroz be. Wî em bi saya Mesîh, bi her bereketa ruhanî ya li cihên ezmanî pîroz kirine. ⁴ Wî em ji beriya damezrandina dinyayê bi Mesîh bijartin, da ku em li ber wî di hezkirinê de pîroz û bêleke bin. ⁵ Li gor kêf û daxwaza xwe, wî em ji pêşî ve kifş kirin, da ku em bi saya Îsa Mesîh jê re bibin zarok. ⁶ Wusa ku kerema wî ya bi rûmet a ku wî bi Hezkiriyê xwe ji me re kiriye xelat, bê pesindan. ⁷ Bi saya wî em bi berdêla xwîna wî rizgar bûne, me lêbihûrtina neheqiyên xwe standiye. Ev

li gor dewlemendiya kerema wî ye ⁸ ya ku wî bi her şehrezayî û fêmdariyê bi zêdehî daye me. ⁹ Wî sira daxwaza xwe ya ku li gor dilê xwe bi Mesîh saz kiribû, bi me da zanîn. ¹⁰ Yanî li gor vê plana ku gava wextê wê hat ewê pêk bîne, ewê hemû tiştan, hem yên li ezmanan, hem jî yên li ser erdê di bin destê Mesîh de bike yek. ¹¹ Li gor mebesta Xwedayê ku her tiştî li gor biryar û daxwaza xwe saz dike, em ji berê ve hatin kifşkirin û bi Mesîh hatin bijartin, ¹² da ku em ên ku me pêşî hêviya xwe bi Mesîh ve girêdaye, ji bo pesindana rûmeta wî bijîn. ¹³ Gava we peyva* rastiyê, Mizgîniya* xilasiya xwe bihîst û bawerî* bi wî anî, hûn jî bi Ruhê* Pîroz ê ku hatibû sozdan, di şexsê wî de hatin morkirin. ¹⁴ Ruh, heta dema rizgariya wan ên ku yên Xwedê ne, destberiya mîrasa me ye. Şikir ji rûmeta Xwedê re!

Duaya Pawlos

¹⁵ Ji bo vê yekê ji dema ku min baweriya* we ya bi Xudan Îsa û hezkirina we ya ji bo hemû pîrozan bihîstiyê ve, ¹⁶ ez we di duayên xwe de tînim bîra xwe û bê rawestin ji bo we şikir dikim, ¹⁷ da ku Xwedayê Xudanê me Îsa Mesîh, Bavê rûmetê, ruhê peyxam* û şehrezayiyê bide we, ku hûn wî hê çêtir nas bikin; ¹⁸ çavên dilê we ronahî bibin, da ku hûn bizanin hêviya ku hûn ji bo wê hatine gazîkirin çi ye û dewlemendiya rûmeta mîrasa wî ji bo pîrozan çi ye ¹⁹ û mezinahiya hêza wî ya bêsinor a ku ji bo me yên ku bawer dikin, li gor qewet û karîna wî dixebite, çi ye. ²⁰ Ev hêz, hêza wî ye, yê ku Mesîh ji nav miriyan rakir û li cihên ezmanî, li milê xwe yê rastê da rûniştin. ²¹ Xwedê, Mesîh ne tenê di vê dinyayê de, lê di dinya ku bê de jî derxist ser her serwerî, desthilatî, hêz û xudantiyê û derxist ser her navê ku tê bîranîn. ²² Ê Xwedê «her tişt xist bin lingên wî»^a û ew bi serîtiya li ser her tiştî da Civînê*. ²³ Ev bedena wî ye, tijetiya wî ye, yê ku li her derê her tiştî tije dike.

Ji Mirinê Derbasbûna Jiyane

2 Hûn jî ji ber neheqî û gunehên xwe mirî bûn. ² Hingê hûn li gor çerxa vê dinyayê, li gor serokê hukumdariya hewayê, yanî

^a 1:22 Ji: Zebûr 8:6

1:7 Kolosî 1:14

1:20 Zebûr 110:1

1:22 Kolosî 1:18

2:1 Kolosî 2:13

li gor wî ruhê ku niha di nav mirovên neguhdar de dixebite, rêve çûn. ³ Demekê em jî, em hemû di nav wan de, me bi daxwaza fikir û bedena xwe kir, em li gor xwestekên nefsê rêve çûn. Ji xwe em jî wek ên din, zarokên xezebê bûn. ⁴ Lê Xwedayê ku bi rehmê dewlemend e, ji ber hezkirina xwe ya mezin a ku bi wê ji me hez kir, ⁵ hê ku em ji ber neheqiyên xwe mirî bûn jî, em bi Mesîh re vejandin. Hûn bi keremê xilas bûn. ⁶ Xwedê em di şexsê Mesîh Îsa de bi wî re rakirin û li cihên ezmanî bi wî re dan rûniştin. ⁷ Wî ev yek kir, da ku dewlemendiya kerema xwe ya bêsinor bi wê qenciya ku bi Mesîh Îsa ji bo me ye, di demên ku bîst de nîşan bide. ⁸ Çimkî hûn bi rîya baweriyê, bi keremê xilas bûn û ev ne ji we ye, diyariya Xwedê ye. ⁹ Ev ne ji kirinan e, da ku tu kes pesnê xwe nede. ¹⁰ Çimkî em berhema Xwedê ne û em bi Mesîh Îsa hatine afirandin, da ku em di van karên qenc de rê ve herin ên ku Xwedê ji pêşî ve amade kirine.

Yekîtiya bi Mesîh

¹¹ Loma bînin bîra xwe – hûn ên ku li gor bedenê millet in – ku hûn demekê ji aliyê wan ên ku bi dest di bedenê de hatine sinetkirin* û ji xwe re sinetbûyî dibêjin ve, «sinetnebûyî» dihatin gotin. ¹² Di wê demê de hûn bê Mesîh bûn, hûn ji hemwelatiya gelê Îsraêl der û ji peymanên* sozê re xerîb, li dinyayê bê hêvî û bê Xwedê bûn. ¹³ Lê niha hûn ên ku demekê dûr bûn, di yekîtiya Mesîh Îsa de, bi saya xwîna Mesîh hûn nêzîk bûne. ¹⁴ Çimkî aştiya* me ew e; wî herdu, Cihû û milletên din kirin yek û bi bedena xwe dîwarê navbirkê, yanî dijminahî hilweşand. ¹⁵ Wî Şerîet* bi emir û qeydeyên wê ve betal kir, da ku di şexsê xwe de ji herduyan, ji Cihû û ji milletên din, mirovekî nû biafirîne û bi wî awayî aştiyê çêke ¹⁶ û bi xaçê herduyan di yek bedenê de bi Xwedê re li hev bîne û bi vê yekê dijminahiyê bikuje. ¹⁷ Îcar ew hat, Mizgîniya aştiyê hem ji we yên ku dûr bûn re û hem jî ji yên nêzîk re da. ¹⁸ Çimkî bi rêberiya wî em herdu dikarin bi yek Ruhî derkevin ber Bav*. ¹⁹ Îcar êdî hûn ne xerîb û biyanî ne, lê belê hûn hemwelatiyên pîrozan û malîyên Xwedê ne. ²⁰ Hûn li ser bingeha Şandî* û pêxemberan* avakirî ne û Mesîh Îsa bi xwe kevirê rîknê bingehê ye. ²¹ Bi wî hemû avahî

2:15 Kolosî 2:14

2:16 Kolosî 1:20

2:17 Îşaya 57:19

hevdu digire û ji bo ku bi Xudan bibe perestgeheke pîroz, mezin dibe. ²² Bi wî hûn jî bi hev re di Ruh de tèn avakirin, da ku hûn bibin warê Xwedê.

Xizmeta Pawlos a ji bo Miletan

3 Ji bo vê yekê ez Pawlos, ji bo we miletan di ber Mesîh Îsa de girtî me. ² Bêguman we bihîstiyê ku ev şahnetiya* keremê ji aliyê Xwedê ve ji bo we ji min re hatiye dayîn. ³ Wek ku min berî niha jî bi kurtî nivîsîbû, ev sir bi peyxamê ji min re hat dayîn. ⁴ Gava ku hûn vê bixwînin, hûnê bikarin têbigihîjin ku ez sira Mesîh çawa fêm dikim. ⁵ Ev sir, wek ku niha ji Şandiyên wî yên pîroz û ji pêxemberên wî re bi Ruh hatiye eşkere kirin, di dema nifş* û qer-nên berê de ji mirovan re nehat vekirin. ⁶ Sir ev e, ku miletên din bi saya Mizgîniyê hemwêris in, endamên eynî bedenê û hevparên soza Xwedê ne, ya ku bi Mesîh Îsa ye. ⁷ Li gor diyariya kerema Xwedê ya ku bi xebata hêza wî ji min re hatiye dayîn, ez bûm xizmetkarê vê Mizgîniyê. ⁸ Bi ser ku ez di nav hemû pîrozan de yê herî kêrîm jî, ev kerem ji min re hat dayîn, da ku ez Mizgîniya dewlemendiya Mesîh a ku nayê salixdan ji miletan re bidim ⁹ û plana bi sira ku ji demên bê destpêk ve li ba Xwedayê ku her tişt afirandiye veşartî bû, ji hemûyan re derxim ber ronahiyê, ku ew çî ye. ¹⁰ Wusa ku şehrezayiya Xwedê ya pîrîr alî, bi saya Civînê*, ji serwerî û desthilatîyên li cihên ezmanî re bê gotin. ¹¹ Ev li gor mebesta Xwedê ya ji demên bêdestpêk ve bû, ya ku wî bi saya Xudanê me Mesîh Îsa pêk anî. ¹² Di yekîtiya Mesîh de û bi bawerîya bi wî, em dikarin bi cesaret û ewlehî derbasî ber Xwedê bibin. ¹³ Ji ber vê yekê, ez ji we hêvî dikim ku hûn, ji ber cefayên ku ez ji bo we dikişînim, dilsar nebin; ew ji bo we rûmet in.

Dua ji bo Efesiyan

¹⁴ Ji bo vê yekê, ez li ber Bavê ku ¹⁵ li erd û ezmanan her bawîkî nav jê standiyê, diçim ser çokan. ¹⁶ Bila ew li gor dewlemendiya rûmeta xwe, qewetê bide we ku hûn bi Ruhê wî, di mirovê hundir de xurt bibin, ¹⁷ da ku bi baweriyê Mesîh di dilê we de rûne û hûn di hezkirinê de ra* bidin û hîmgirtî bin, ¹⁸ da ku hûn bikarin

3:4-6 Kolosî 1:26-27

bi hemû pîroz an re firehî, dirêjahî, bilindahî û kêrahîya vê hezkirinê fêm bikin. ¹⁹ Bi vî awayî, hûn hezkirina Mesîh a ku gelek di ser zanîne re ye bizanin û bi hemû tijetiya Xwedê tije bibin.

²⁰ Ew bi hêza xwe ya ku di hundirê me de dixebite, dikare ji ya ku em dixwazin an jî em difikirin hê bêtir bike. ²¹ Di Civînê de û bi saya Mesîh Îsa heta hemû nifşan û her û her rûmet ji wî re be. Amîn*.

Yekîtiya Bedenê

4 Îcar ez yê ku di ber Xudan de girtî me, ez ji we hêvî dikim ku hûn di jiyana xwe de bi awayê ku hêjayî gazîkirina we ye, rêve herin. ² Di hezkirinê de bi hemû nefsbîçûkî û nermiyê bi bîhnfirehî hevdû ragirin. ³ Xîretkêşiyê bikin ku hûn yekîtiya Ruh bi hevgerîdana aştiyê biparêzin. ⁴ Wek ku Xwedê hûn gazî yek hêviyê kirine, beden yek e, Ruh yek e ⁵ Xudan yek e, bawerî yek e, imad* yek e. ⁶ Xwedê yek e, bavê hemûyan e; ew di ser hemûyan re ye, bi hemûyan re ye û di nav hemûyan de ye.

⁷ Û li gor pîvana diyariya Mesîh ji her yekî ji me re kerem hat dayîn. ⁸ Loma dibêje:

«Gava ku hilkişiya jor,
Hêsîr* li pey xwe birin,
Û diyarî dan mirovan.»^a

⁹ Ev «derket jor» tê mana çi? Dixwaze bêje ku pêşî ew daketibû derên erdê yên jêr. ¹⁰ Yê ku daketiye û ji bo ku her tiştî tije bike derketiye jor, di ser hemû ezmanan re eynî ew e. ¹¹ Wî bi xwe diyarî da, ku hinek bibin Şandî, hinek pêxember, hinek mizgînavan, hinek jî şivan û mamoste, ¹² da ku yên pîroz ji bo xebata xizmetkirinê bên rapêçan û bedena Mesîh bê avakirin ¹³ heta ku em hemû bigihîjin yekîtiya bawerî û naskirina Kurê* Xwedê û bibin mirovê gihîştî, bigihîjin pîvana bejna Mesîh a temam û tije. ¹⁴ Da ku êdî em nebin zarokên ku bi pêlan vir ve û wê ve tîn kişikşandin, li ber her bayê hîndariya mirovên xapînok diçin û bi qurnaziya hîlekariyên wan ji rê derdikevin. ¹⁵ Lê em bi hezkirinê rastiye bêjin, di her tiştî de ber bi wî ve mezin bibin ku serî ew e,

^a 4:8 Ji: Zebûr 68:18

4:2 Kolosî 3:12-13

Mesîh e. ¹⁶ Bi wî hemû beden hevdû digire û bi alfkariya her movikê girêdayî ye; bi wî her endam li gor qeweta xwe dixebite û bi vî awayî beden mezin dibe û di hezkirinê de tê avakirin.

Jiyana Kevin û ya Nû

¹⁷ Loma ez vê dibêjim û bi navê Xudan li ser disekinim: Êdî wek miletên din ên ku di fikirîna xwe ya pûç de rêve diçin, hûn neçin. ¹⁸ Têgihîştina wan tarî ye; ew ji ber xeşîmî û hişkîtiya dilê xwe, ji jiyana Xwedê re biyanî ne. ¹⁹ Wan her pêhesîn winda kiriye û ji bo ku bi çavbirçîftî her pîsîtiyê bikin, xwe dane destê bêede-biyê. ²⁰ Lê we Mesîh bi vî awayî nas nekir. ²¹ Bêguman we li ser wî bihîstiye û wek ku rastî bi Îsa ye, hûn li gor wî hatine hînkirin. ²² Îcar mirovê kevin ê li gor jiyana we ya berê, yê ku bi xwestekên xapînok dirize, ji ser xwe bavêjin ²³ û di ruh û hişê xwe de nû bibin ²⁴ û mirovê nû li xwe bikin, ku di rastdarî û pîroziya rastiye de li gor Xwedê hatiye afirandin.

²⁵ Loma derewan ji xwe dûr bixin û «her yek ji we bi cîranê xwe re rastiye bipeyivin»^a, çimkî em endamên hev in. ²⁶ «Hêrs bibin, lê guneh nekin»^b; bila roj li ser hêrsa we neçe ava. ²⁷ Ne jî rê bidin Îblîs. ²⁸ Yê ku dizî kiriye, divê êdî diziyê neke, lê bila bi destê xwe tiştê qenc bike û bixebite, da ku tiştêkî wî hebe ku bide yê hewcedar. ²⁹ Bila qet gotina xerab ji devê we dernekeve, lê belê ji bo perwerdekirinê çî qenc be – wek ku lazim e – wê bêjin, da ku ew ji guhdaran re keremdar be. ³⁰ Ruhê* Xwedê yê Pîroz ê ku hûn ji bo roja rizgariyê bi wî hatine morkirin, xemgîn nekin. ³¹ Bila bi her xerabiyê re her tehlî, hêrs, xezeb, qîrîn û buxtan ji we dûr kevin. ³² Li hember hev keremdar û dilovan bin û wek ku Xwedê bi Mesîh li we bihûrtiye, li hevdû bibihûrin.

5 Ji bo vê yekê, wek zarokên delal mîna Xwedê bikin. ² Çawa ku Mesîh ji me hez kir û ji bo me xwe feda kir û xwe wek pêşkêş û goriyeke* bihxweş pêşkêşî Xwedê kir, hûn jî wusa di hezkirinê

^a 4:25 Ji: Zekerya 8:16
4:16 Kolosî 2:19
4:24 Kolosî 3:10

^b 4:26 Ji: Zebûr 4:4
4:22 Kolosî 3:9; Romayî 6:6
4:32 Kolosî 3:13

de rêve herin. ³ Bi awayê ku li pîrozana tê, divê di nav we de, navê fuhûşiyê û her cûreyê nepakî an çavbirçîtiyê qet neyê gotin jî. ⁴ Û divê peyvîna bêedebî û bi ehmeqî, an henekên zir, yanî tiştên ku ne hêja ne, nebin, lê hê bêtir hûn şikirdar bin. ⁵ Vê yekê qenc bizanin ku di Padîşahiya Mesîh û Xwedê de mîrasa tu mirovê fuhûşker, nepak an jî mirovê çavbirçî yanî pûtperest*, tune.

Zarokên Ronahiyê

⁶ Bila tu kes we bi peyvên pûç nexapîne, çimkî xezeba Xwedê ji ber van tiştan tê ser kurên neguhdariyê. ⁷ Îcar hûn nebin hevparên wan. ⁸ Demekê hûn tarî bûn, lê niha hûn bi Xudan ronahî ne. Îcar wek zarokên ronahiyê rêve herin, ⁹ ji ber ku berê ronahiyê di her qencî, rastî û heqîqetê de ye. ¹⁰ Tiştê ku li xweşa Xudan diçe, kifş bikin. ¹¹ Nebin hevparên karên tariyê yên bêber, lê hê bêtir wan tiştan eşkere bikin. ¹² Çimkî tiştên ku ew bi dizî dikin, eyb e ku bîn gotin jî. ¹³ Lê her tiştê ku dikeve ber ronahiyê, xuya dibe. ¹⁴ Çimkî her tiştê ku xuya dibe, ronahî ye. Loma tê gotin:

«Ey yê ku radize, hişyar bibe!

Ji nav miriyan rabe û

Mesîh wê ji te re bibiriqe.»

¹⁵ Loma bala xwe bidinê ka hûn çawa rêve diçin, ne wek ên neşehreza, lê belê wek ên şehreza herin. ¹⁶ Îcar ji fersenda vê demê îstifade bikin, çimkî roj xerab in. ¹⁷ Loma ne bêaqil bin, lê belê fêhm bikin ka daxwaza Xudan çi ye. ¹⁸ Û bi şerabê serxweş nebin, di wê de bêedebî heye; lê bi Ruh tije bibin. ¹⁹ Ji hev re Zebûr, lavije* û stranên ruhanî bêjin, di dilê xwe de ji Xudan re stran û lavijeyan bistrînin. ²⁰ Hergav ji bo her tiştî bi navê Xudanê me Îsa Mesîh ji Bav Xwedê re şikir bikin.

Têkiliyên nav Malê

²¹ Bi tirsaya Mesîh bi ya hev bikin. ²² Ey jinno! Wek ku hûn bi ya Xudan dikin, wusa bi ya mêrê xwe bikin. ²³ Çimkî, ka çawa Mesîh serê Civînê ye, mêr jî serê jinê ye û Mesîh bi xwe xilaskarê Civînê, yanî bedenê ye. ²⁴ Îcar çawa ku Civîn bi ya Mesîh dike, bila jin jî

5:14 Binêre: Îşaya 26:19; 60:1

5:19 Kolosî 3:16-17

5:16 Kolosî 4:5

5:22 Kolosî 3:18; 1 Petrûs 3:1

bi vî awayî di her tiştî de bi ya mêtê xwe bike. ²⁵ Ey mêrno! Wek ku Mesîh ji Civînê hez kir û xwe di ber wê de feda kir, bila her kes ji jina xwe hez bike. ²⁶ Wî xwe feda kir, da ku Civînê bi peyva xwe pîroz bike û bi şuştina avê paqij bike, ²⁷ da ku Civînê bi rewneqiya* wê ve pêşkêşî xwe bi xwe bike, ku tu leke an qermîçek an tiştêkî wek van li ser wê nebe, lê belê ew pîroz û bêleke be. ²⁸ Bi vî awayî her mêtê jî deyndar e ku wek bedena xwe, ji jina xwe hez bike. Yê ku ji jina xwe hez dike, ji xwe hez dike. ²⁹ Çimkî tu kes, tu caran ji bedena xwe nefret nekiriye, lê ew bedena xwe xweyî dike û xema wê dixwe, wek ku Mesîh jî Civînê xweyî dike û xema wê dixwe. ³⁰ Çimkî em endamên bedena wî ne. ³¹ «Loma mêtê wê dê û bavê xwe berde, bi jina xwe re bibe yek û herdu jî wê bibin bedenek.»^a ³² Ev sir mezin e; lê ez vê li ser Mesîh û li ser Civînê dibêjim. ³³ Loma bila her yek ji we jî wek ku ji xwe hez dike, ji jina xwe hez bike û bila jin siyaneta* mêtê xwe bigire.

6 Zarokno, li gor Xudan li ber dê û bavê xwe serî deynin, çimkî ev rast e. ² «Qedrê dê û bavê xwe bigire» – emrê pêşî yê bi sozê, ev e: ³ «Da ku qencî li te bibe û li ser erdê emrê te dirêj be.»^b ⁴ Bavno! Hûn jî hêrsa zarokên xwe ranekin, lê wan bi terbiye û şîreta Xudan perwerde bikin.

⁵ Xulamno, wek ku hûn li ber Mesîh serî datînin, bi tirs û lerizîn û ji dil û can li ber mîrzayên xwe yên li ser dinyayê serî deynin. ⁶ Vê yekê ne bi xizmeta ku li ber çav tê kirin ku li mirovan xweş bê, lê belê wek xizmetkarên Mesîh, daxwaza Xwedê ji dil û can bînin cih. ⁷ Ne wek ji mirovan re, lê wek ku ji Xudan re tê kirin ji dil û can xizmetê bikin. ⁸ Û hûn dizanin ku her kî çi qencyê bike, wê bergîdanê* ji Xudan bistîne, dixwazî bila xulam be, dixwazî bila azad be.

⁹ Hûn jî, mîrzano eynî tiştan ji wan re bikin û êdî dev ji gefxwarinê berdîn, çimkî hûn dizanin ku Xudanê we û yê wan li ezmanan e û li ba wî xatirgirtin tune.

^a 5:31 Ji: Destpêkirin 2:24

^b 6:2-3 Ji: Derketin 20:12; Dubarekirina Şerîetê 5:16

5:25 Kolosî 3:19; 1 Petrûs 3:7 6:1 Kolosî 3:20

6:4-5 Kolosî 3:21-25

6:9 Kolosî 4:1; Dubarekirina Şerîetê 10:17

Çekên ku Xwedê Dide

¹⁰ Bi kurtî, bi Xudan û bi qeweta karîna wî bi hêz bibin. ¹¹ Ji bo ku hûn bikarin li hember hîleyên Îblîs rawestin, hemû çekên Xwedê li xwe bikin. ¹² Çimkî cenga me ne li hember xwîn û goşt e, lê belê li hember serweriyan, li hember desthilatiyan, li hember hukumdarên gerdûnê yên vê taristaniyê, li hember ordiyên ruhî yên xerabiyê yên li cihên ezmanî ye. ¹³ Ji ber vê yekê hemû çekên Xwedê bistînin, da ku hûn bikarin di roja xerab de li ber xwe bidin û piştî ku we her tişt kir, li cihê xwe rawestin. ¹⁴ Îcar, piştî xwe bi rastiye bipêçin û zirxê rastdariyê li xwe bikin ¹⁵ û lingên xwe ji bo Mizgîniya aştiyê bi amadebûnê pêlav bikin û li cihê xwe bisekinin. ¹⁶ Bi ser hemûyan de, mertalê baweriyê yê ku hûn pê bikarin hemû tîrên agirî yên Yê Xerab bitemirînin, bigirin destê xwe. ¹⁷ Û rahêjin kumzirxê xilasîyê û şûrê Ruh ê ku peyva Xwedê ye. ¹⁸ Bi her dua û lavakirinê, herdem bi Ruh dua bikin. Ji bo vê yekê hişyar bimînin û ji bo hemû pêrozên herdem bi berdewamî lava bikin. ¹⁹ Ji bo min jî dua bikin, da ku, gava ez devê xwe vekim, peyv ji min re bê dayîn û ez sira Mizgîniyê bi ziravî bidim zanîn. ²⁰ Di ber wê de ez bi zincîran girêdayî qasidiyê dikim. Dua bikin, da ku ez bê tirs, wek ku pêwîst e, wê bêjim.

Silavên Aştiyê

²¹ Ji bo ku hûn jî bizanin ez çawa me û çî dikim, birayê hezkirî û di yekîtiya Xudan de xizmetkarê dilsoz Tixîkos* wê her tiştî bi we bide zanîn. ²² Ez wî ji bo vê yekê dişînim ba we, da ku hûn tiştên li ser me bizanin û ew cesaretê bide dilê we.

²³ Bila aşî û bi baweriyê hezkirin ji Bav Xwedê û Xudan Îsa Mesîh ji birayan re be. ²⁴ Kerem li ser wan hemûyan be, yên ku bi hezkirina nemir ji Xudanê me Îsa Mesîh hez dikin.

6:14 Îşaya 59:17

6:15 Îşaya 52:7

6:17 Îşaya 59:17